

## Vremeplov (29): Zagreb prvak, Iztok Puc, Kovčić...

Prije nešto manje od 27 godina Tuzli je povjereno domaćinstvo 36. finala Kupa Jugoslavije za rukometaše.

“Sportske novosti”, Zagreb, 22. april 1991. godine

Trijumfovao je Zagreb pobijedivši Crvenu zvezdu 26:25 (14:14), predvođen sjajnim Iztokom Pucom koji je “zabio” 11 golova od kojih 10 iz igre. Patrik Čavar je postigao 7, od čega 4 iz “sedmeraca”.

Zvezdu su predvodili Butulija 8 (dva sa 7 m), Prokić je postigao 7.

Bila je velika rukometna fešta u Mejdanu, gdje se okupilo oko 2.000 gledatelja, mnogi iz Zagreba i Beograda. Pehar pobjednicima predao je Sarajlija Mustafa Demir, tada predsjednik RS Jugoslavije.

Prije finala, oba kluba nadmetala su se za naklonost Fukara, nudili su besplatne ulaznice, navijačke rekvizite i koješta drugo, ali je, na kraju, Zagreb ipak imao više pristalica na tribinama.

Tuzla je dobila domaćinstvo, jer su u to vrijeme ovdašnji i muški i ženski rukomet bili na cijeni. Te godine rukometaši su izorili plasman u prvu ligu.

Danas su u vrhu samo “labudice”, dok “solara” nema nigdje. Kao da je muški rukomet zamro.

No, to je tema za neke druge prilike. Objavom ovog izvještaja iz “Sportskih novosti”, želimo podsjetiti još na jedan detalj – na jednog od izvještača. Riječ je o Jasminku Kovčiću Tacku, u to vrijeme golmanu s velikim potencijalom, ali i novinarom koji je obećavao.

Tandem golmana: Jasminko Kovčić i Damir Cipurković 1989. godine

Bio je predan svom poslu, bilo u ulozi rukometnog golmana ili žurnaliste. Vrlo sistematičan, prava mala enciklopedija sporta, pogotovo rukometa. Rat ga je uništio, doslovce. Iako ga je kolega “suizvještač” iz ovog teksta pokušavao dići na noge, bodriti i vratiti sportu i novinarstvu, kao u ostalom i porodica i neki prijatelji, Jasko je na tragičan način napustio ovaj svijet 1994. godine, s 29 godina.

Velika šteta, jer da se fatum nije umiješao, vjerovatno bi napravio sjajnu karijeru. I kao rukometaš, ali i kao novinar.

Ovaj “vremeplov” je, ujedno, mali, skromni omaž Jasminku Kovčiću – Tacku, dobrom tuzlanskom dječaku, zaljubljeniku u rukomet i novinarstvo! (mp)

Date: 31-01-2018